

Na osnovu člana 7. Zakona o budžetima u Federaciji Bosne i Hercegovine („Službene novine Federacije Bosne i Hercegovine“ , broj: 102/13, 9/14, 13/14) i člana 15. Zakona o principima lokalne samouprave u Federaciji Bosne i Hercegovine ("Službene novine FBiH", broj:49/06), Gradsko vijeće Tuzla, na sjednici održanoj dana \_\_\_\_\_2014. godine, d o n o s i:

**O D L U K U**  
**o izvršavanju budžeta Grada Tuzla za 2015. godinu**

**I – OPŠTE ODREDBE**

Član 1.  
(Predmet)

Ovom Odlukom uređuje se struktura prihoda i primitaka, rashoda i izdataka budžeta Grada Tuzla za 2015. godinu (u daljem tekstu: Budžet), njegovo izvršavanje, prioriteti plaćanja, obim zaduživanja i garancije, upravljanje javnim dugom, prava i obaveze korisnika budžetskih sredstava, ovlaštenja Gradonačelnika, gradskih službi za upravu, gradskih stručnih i drugih službi, gradskih upravnih organizacija i Gradskog pravobranilaštva, kao i druga pitanja o izvršavanju budžeta za tekuću godinu.

Član 2.  
(Pojam)

Budžet je procjena godišnjih prihoda i primitaka, te utvrđenih iznosa izdataka i drugih plaćanja grada, koji donosi Gradsko vijeće.

Budžet se odnosi na fiskalnu 2015. godinu, koja počinje 01. januara, a završava 31. decembra 2015. godine.

Član 3.  
(Struktura budžeta)

- (1) Budžet se sastoji od općeg i posebnog dijela i plana razvojnih programa.
- (2) Opći dio budžeta sastoji se od računa prihoda i rashoda.
- (3) Posebni dio budžeta sastoji se od plana rashoda i izdataka budžetskih korisnika raspoređenih u tekuće i kapitalne izdatke za tekuću budžetsku godinu.

(4) Plan razvojnih programa iz stava 1. sastoji se od programa budžetskih korisnika koji sadrže:

- naziv programa
- opis programa
- potrebna sredstva za provođenje programa po izvorima prihoda, godine u kojima će rashodi za programe teretiti budžete slijedećih godina (višegodišnji investicioni programi) i
- druge elemente koji su značajni za provođenje programa

(5) U slučaju usvajanja višegodišnjeg investicionog programa iz prethodnog člana, kapitalni izdaci smatrat će se budućim opterećenjima budžetskih pozicija prema kriterijima vremenske dinamike utvrđene u investicionom programu.

Član 4.  
(Budžetski korisnici)

Budžetski korisnici su gradske službe za upravu, gradske stručne i druge službe, gradske upravne organizacije i Gradsko pravobranilaštvo.

Budžetski korisnici su i javne ustanove: JU Obdanište „Naše dijete“ Tuzla, JU Centar za socijalni rad Grada Tuzla, JU Dom mladih Tuzla i JU Gradski stadion „Tušanj“.

Član 5.  
(Evidencije)

Transakcije svih prihoda i izdataka i poslovne aktivnosti iz budžeta evidentiraju se u Glavnoj i Pomoćnim knjigama trezora.

Član 6.  
(Uplata prihoda)

(1) Svi javni prihodi i primici budžeta, uključujući i prihode koje korisnici budžeta ostvaruju obavljanjem osnovne djelatnosti po posebnim propisima, uplaćuju se na depozitni račun Grada Tuzla i iskazuju po izvorima iz kojih potiču.

(2) Prihodi ostvareni na osnovu Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“ broj:29/03, 22/06, 43/10) evidentiraju se na posebnom transakcijskom računu „Grad Tuzla – Sredstva za otklanjanje posljedica prirodne nesreće“ i koriste se u skladu sa Zakonom o finansiranju pomoći za otklanjanje posljedica prirodne nesreće i obnovu područja zahvaćenih prirodnom nesrećom („Službene novine Federacije BiH“ br. 59/14), odnosno u skladu sa Odlukom o uslovima i načinu korištenja sredstava po osnovu posebne naknade za zaštitu od prirodnih i drugih nesreća („Službene novine Federacije BiH“ br.46/05 i 61/07).

(3) Prihodi ostvareni po osnovu naknade za izgradnju skloništa u skladu sa Zakonom o zaštiti i spašavanju FBiH („Službene novine Federacije BiH“ br. 39/03, 22/06, 43/10), evidentiraju se na posebnom transakcijskom računu „Grad Tuzla – Sredstva za otklanjanje posljedica prirodne nesreće“ i koriste se u skladu sa Zakonom o finansiranju pomoći za otklanjanje posljedica prirodne nesreće i obnovu područja zahvaćenih prirodnom nesrećom („Službene novine Federacije BiH“ br. 59/14), odnosno koriste se za izgradnju i održavanje javnih skloništa, u skladu sa dugoročnim programima i godišnjim planovima za izradu javnih skloništa.

(4) Prihodi ostvareni na osnovu Zakona o izdvajanju i usmjeravanju dijela prihoda preduzeća ostvarenih radom termoelektrana („Službene novine FBiH“, broj: 80/14), koristit će se u skladu sa članom 6. citiranog Zakona.

## II - IZVRŠAVANJE BUDŽETA

Član 7.  
( Sredstva za budžetske korisnike)

(1) Sredstva budžeta koriste se za finansiranje izdataka iz nadležnosti gradskih službi za upravu, stručnih službi, upravnih organizacija, javnih ustanova i ostalih čije je finansiranje iz budžeta predviđeno posebnim propisom.

(2) Sredstva budžeta osiguravaju se budžetskim korisnicima koji su u posebnoj dijelu budžeta određeni za nosioce sredstava na pojedinim pozicijama.

(3) Korisnici koriste budžetska sredstva samo za namjene koje su određene budžetom, i to do visine utvrđene u njegovom posebnoj dijelu.

Član 8.  
(Neplanirana namjenska sredstva budžetskih korisnika)

(1) Donacije, grantovi i namjenski transferi uplaćeni na depozitni račun Grada Tuzla, a koji nisu planirani u Budžetu Grada Tuzla, usmjeravaju se u budžet za fiskalnu godinu na osnovu Odluke Gradonačelnika, a na prijedlog Službe za budžet i finansije.

Član 9.  
(Odgovornost za prikupljanje prihoda)

Budžetski korisnici odgovorni su za potpuno i pravovremeno prikupljanje i uplaćivanje na depozitni račun Grada Tuzla prihoda budžeta, namjenskih sredstava i vlastitih prihoda iz svoje nadležnosti.

Budžetski korisnici odgovorni su za zakonitost, svrsishodnost, efikasnost i ekonomičnost raspolaganja budžetskim sredstvima.

Član 10.  
(Operativni budžeti)

(1) Budžet se izvršava na temelju mjesečnih planova raspoloživih budžetskih sredstava, koje odobrava Služba za budžet i finansije na osnovu dinamike priliva sredstva u budžetu.

(2) Budžetski korisnici pripremaju i podnose prijedloge operativnih budžeta Službi za budžet i finansije.

(3) Prijedlozi operativnih budžeta obuhvataju rashode za svaki mjesec.

(4) Služba za budžet i finansije izvještava korisnike o odobrenim operativnim budžetima.

(5) Rashodi svakog korisnika ne mogu prelaziti iznose budžetskih sredstava utvrđenih u operativnom budžetu.

Član 11.  
(Prioriteti izvršavanja budžeta)

Budžet se izvršava u skladu sa njegovim likvidnim mogućnostima po slijedećim prioritetima:

1. otpлата duga i kamata,
2. plaće i naknade zaposlenih,
3. grantovi za jednokratne pomoći u oblasti socijalne i boračko invalidske zaštite,
4. materijalni i drugi troškovi neophodni za rad gradskih službi za upravu,
5. naknade za rad u Gradskom vijeću i radnim tijelima Gradskog vijeća,
6. plaćanje obaveza po sudskim presudama,
7. tekući izdaci za komunalnu infrastrukturu,
8. kapitalni izdaci za komunalnu infrastrukturu i
9. ostalo.

Član 12.  
(Javne nabavke)

Postupak nabavke roba, usluga i ustupanja radova mora se obavljati u skladu sa Zakonom o javnim nabavkama BiH („Službeni glasnik BiH“, broj: 39/14).

Član 13.  
(Tekuća rezerva)

(1) Hitni i nepredviđeni izdaci koji se pojave u toku budžetske godine podmiruju se iz sredstava Tekuće rezerve utvrđene u budžetu.

(2) O korištenju sredstava Tekuće rezerve, odlučuje Gradonačelnik, na prijedlog nadležne službe.

(3) Budžetsko izdvajanje za Tekuću rezervu ne smije preći 3% ukupnih prihoda, isključujući primitke.

(4) Ako se tokom godine, na osnovu zakona ili drugih propisa poveća nadležnost korisnika, što zahtijeva povećana sredstva, ili se osnuje novi korisnik, sredstva za njegove troškove mogu se osigurati iz Tekuće rezerve budžeta, a odobrava ih Gradonačelnik.

(5) Ako se tokom godine, na osnovu zakona ili drugih propisa umanja nadležnost korisnika, što zahtijeva smanjena sredstva, ili se korisnik ukine, neutrošena sredstva za njegove troškove prenose se u Tekuću rezervu budžeta ili na korisnika koji preuzme njegove poslove.

(6) Služba za budžet i finansije obavezna je tromjesečno izvještavati Gradonačelnika o korištenju sredstava Tekuće rezerve.

(7) Gradonačelnik polugodišnje izvještava Gradsko vijeće o korištenju sredstava Tekuće rezerve.

**Član 14.**  
(Preraspodjela sredstva)

Gradonačelnik može na prijedlog budžetskog korisnika, donijeti odluku o prestrukturiranju rashoda u okviru ukupnog iznosa odobrenog za budžetskog korisnika, a najviše do 10% ukupno odobrenih rashoda za budžetskog korisnika.

U okviru odobrenog budžeta, preraspodjela sredstava iznimno je dozvoljena između budžetskih korisnika.

O preraspodjeli iz prethodnog stava odlučuje Gradonačelnik na prijedlog Kolegija Gradonačelnika.

**Član 15.**  
(Jedinstveni račun trezora)

(1) Obavljanje platnih transakcija vrši se preko transakcijskih računa koji su sastavni dio jedinstvenog računa trezora (u daljem tekstu: „JRT“).

(2) JRT može imati više podračuna.

(3) Sa JRT se ne može isplatiti ni jedan izdatak ukoliko nije odobren budžetom.

**Član 16.**  
(Povrat više ili pogrešno uplaćenih prihoda)

Povrat pogrešno ili više uplaćenih javnih prihoda u tekućoj godini vrši se sa računa javnih prihoda (depozitnog računa) iz tekućeg priliva korisnika prihoda, a povrat prihoda koji nisu uplaćeni u tekućoj godini vrši se sa transakcijskih računa korisnika prihoda, u skladu sa odredbama važećeg Pravilnika o načinu uplate javnih prihoda budžeta i vanbudžetskih fondova na teritoriji Federacije BiH.

### **III - REALIZACIJA SREDSTAVA BUDŽETA**

**Član 17.**  
(Sredstva za rad Gradskog vijeća Tuzla)

(1) Sredstva utvrđena za isplatu naknada za rad u Gradskom vijeću i u radnim tijelima Gradskog vijeća isplaćuju se na osnovu Odluke o naknadama vijećnicima i članovima radnih tijela Općinskog vijeća („Službeni glasnik općine Tuzla“, br. 6/97, 10/02 i 12/06), Odluke o naknadama predsjedavajućeg, zamjenika predsjedavajućeg i predsjednika Klubova vijećnika u Općinskom vijeću Tuzla („Službeni glasnik općine Tuzla“ br. 8/07) i drugim propisima koji regulišu ovu oblast.

(2) Raspodjela sredstava za rad parlamentarnim političkim subjektima u Gradskom vijeću Tuzla vrši se u skladu sa važećom Odlukom o izdvajanju sredstava iz Budžeta Grada Tuzla za rad političkih partija, koalicija, lista nezavisnih kandidata i parlamentarnih grupa.

**Član 18.**  
(Plaće i naknade troškova zaposlenih)

(1) Sredstva utvrđena u budžetu za plaće, isplaćuju se u skladu sa važećom Odlukom o plaćama uposlenika gradskih organa Tuzla.

(2) Sredstva za naknade zaposlenih isplaćuju se u skladu sa važećom Odlukom o naknadama uposlenika gradskih organa Tuzla.

(3) Sredstva za plaće i naknade uposlenih u javnim ustanovama, iz člana 4. stav 2. ove Odluke, obračunavat će se i isplaćivati u skladu sa važećim pravilnicima javnih ustanova.

Član 19.  
(Raspoređivanje sredstava)

Sredstva utvrđena u Budžetu grada Tuzla na pozicijama:

1. Grantovi pojedincima-socijalne jednokratne pomoći,
2. Grantovi pojedincima-jednokratne pomoći korisnicima BIZ-a,

raspoređuju se na osnovu pravilnika ili finansijskog plana koji donosi Gradsko vijeće.

Član 20.

Sredstva utvrđena u budžetu Grada Tuzla na pozicijama :

1. Nagrade studentima i učenicima,
2. Grant za učešće u realizaciji Akcionog plana BiH za rješavanje problema Roma,
3. Grantovi neprofitnim organizacijama -- sport,
4. Tekući grant za trenažni proces i troškove takmičenja sportskih klubova u sportskim objektima,
5. Izdaci za realizaciju manifestacije - Književni susreti „Cum Grano Salis“,
6. Grantovi neprofitnim organizacijama – udruženja poljoprivrednika,
7. Grant neprofitnoj organizaciji RSD „Sloboda“ Tuzla,
8. Grant za JU „Muzej istočne Bosne“Tuzla,
9. Grant neprofitnoj organizaciji-Sportski savez grada Tuzla,
10. Grant neprofitnoj organizaciji- UG“Kuća plamena mira“ Tuzla,
11. Grant neprofitnim organizacijama- UG „Lovačko društvo Tuzla“,
12. Grantovi za kulturne manifestacije,
13. Grantovi za sportske manifestacije,
14. Grantovi neprofitnim organizacijama-udruženja, organizacije i fondacije,
15. Grant neprofitnoj organizaciji KK „Jedinstvo“ Tuzla,
16. Grant za MDD „Merhamet“ za Narodnu kuhinju“Imaret“,
17. Tekući grant za JZU Gradske apoteke Tuzla,
18. Tekući grant za manifestaciju INTERBIFEP,
19. Grant neprofitnoj organizaciji OKK „Sloboda“ Tuzla,
20. Grantovi za zaštitu kulturno istorijskog i prirodnog naslijeđa,
21. Transfer za rad -- Gradsko udruženje samostalnih privrednika,
22. Transfer za rad -- Crveni križ grada Tuzla,
23. Transfer za rad -- Udruženje penzionera grada Tuzla,
24. Transfer za rad -- JU „Narodno pozorište“ Tuzla,
25. Transfer za rad -- JU Narodna i univerzitetska biblioteka „Derviš Sušić“ Tuzla,
26. Transfer za rad -- Međunarodna galerija portreta u Tuzli,
27. Transfer za rad -- JP „RTV 7“ Tuzla,
28. Transfer za rad – JP SKPC „Mejdan“ Tuzla,
29. Transfer za rad – JP „Veterinarska stanica“ Tuzla,
30. Transfer za rad – RPC Tuzla – „Inkubator Lipnica“,
31. Transfer za rad – JP BIT Centar Tuzla,
32. Tekući grant za finansiranje projekata iz oblasti poduzetništva,
33. Tekući grant za razvoj primarne poljoprivredne proizvodnje,
34. Tekući grant za za projekat „Osnivanje prihvatne stanice za djecu zatečenu u skitnji“ UG „Zemlja djece“,
35. Kapitalni grant za razvoj primarne poljoprivredne proizvodnje,
36. Kapitalni grant vjerskim zajednicama,
37. Kapitalni grant za rekonstrukciju Službe hitne pomoći u JZU „Dom zdravlja Tuzla“,
38. Kapitalni grant za razvojni projekat JP RPC – Inkubator Lipnica,
39. Kapitalni grant za nabavku opreme za JZU „Dom zdravlja Tuzla“ (reanomobil),
40. Kapitalni grant za realizaciju projekta – rekonstrukcija zgrade SKPC „Mejdan“ Tuzla,
41. Kapitalni grant za rekonstrukciju zgrade JU „Narodno pozorište Tuzla“,
42. Grant za Aero-klub Tuzla,
43. Grant za medije,

- 44. Grant neprofitnim organizacijama – DVD sa područja Grada Tuzla,
- 45. Grantovi za raseljena lica – pomoć povratku.

raspoređuju se na osnovu odluka i programa raspodjele sredstava za svaku poziciju u ovom članu, usvojenih od strane Gradonačelnika, a na prijedlog nadležne Službe u skladu sa utvrđenim kriterijima.

Program raspodjele sredstava za pozicije iz stava 1. ovog člana sadrži slijedeće elemente:

- naziv projekta,
- ime korisnika projekta,
- visinu i strukturu sredstava za realizaciju projekta,
- broj transakcijskog računa korisnika projekta.

Resorne službe su dužne, nakon okončanja procedure raspodjele sredstava, zaključiti ugovore sa korisnicima o načinu korištenja sredstava, te pratiti njihovu realizaciju.

#### Član 21.

(Grant za pomoć Fondaciji „Istina – pravda – pomirenje“ Tuzla)

Sredstva utvrđena u budžetu na poziciji Grant za pomoć Fondaciji „Istina – pravda – pomirenje“ Tuzla koriste se na osnovu Finansijskog plana i Programa aktivnosti Fondacije za 2015. godinu, usvojenih od strane Komisije za istinu o Tuzli 1992. – 1995. Gradskog vijeća Tuzla.

Navedena sredstva uplaćivat će se Fondaciji „Istina – pravda – pomirenje“ Tuzla kvartalno, na osnovu zahtjeva i usvojenog izvještaja Fondacije o utrošku uplaćenih sredstava za predhodni kvartal, od strane Komisije iz stava 1. ovog člana.

#### Član 22.

(„Grantovi neprofitnim organizacijama- udruženja poljoprivrednika“)

Sredstva utvrđena za realizaciju „Grantova neprofitnim organizacijama- udruženja poljoprivrednika“ Grada Tuzla, koriste se prema Pravilniku o utvrđivanju postupka i kriterija za dodjelu sredstava namijenjenih za finansiranje udruženja poljoprivrednika („Službeni glasnik općine Tuzla“, broj: 07/05).

#### Član 23.

(Grantovi korisnika BIZ-a)

(1) Sredstva utvrđena u budžetu na poziciji „Učešće grada u troškovima postupka pribavljanja odobrenja za građenje korisnika BIZ-a“ koriste se na način propisan Odlukom o subvencioniranju naknade za pogodnost lokacije i troškova u postupku građenja i legalizacije stambenih objekata („Službeni glasnik općine Tuzla“, broj:11/06, 6/10).

(2) Sredstva za rad organizacija i udruženja iz oblasti boračko-invalidske zaštite sa područja Grada Tuzla, koriste se na način propisan Odlukom o uslovima, kriterijima i postupku dodjele sredstava za finansiranje rada i realizaciju programskih ciljeva organizacija i udruženja iz oblasti boračko-invalidske zaštite sa područja općine Tuzla, („Službeni glasnik općine Tuzla“, broj:02/10).

#### Član 24.

(Program kapitalnih investicija)

Sredstva utvrđena u budžetu Grada Tuzla, kao „Kapitalni izdaci“ u okviru Službe za komunalne poslove, izgradnju i poslove mjesnih zajednica - Odjeljenje za komunalnu infrastrukturu, koriste se prema Programu kapitalnih investicija Grada Tuzla, usvojenog od strane Gradskog vijeća Tuzla.

Član 25.  
(Grant za JP „Radio – televizija 7“ Tuzla – otplata  
anuiteta po kreditu za nabavku opreme)

Sredstva utvrđena u budžetu, u organizacionoj jedinici Služba za razvoj, poduzetništvo i društvene djelatnosti, na poziciji „Grant za JP „Radio – televizija 7“ Tuzla koristit će se za otplatu anuiteta za nabavku opreme, a realizovat će se na osnovu zahtjeva nadležne Službe i uz dostavljeni dokaz o uplati predhodnog anuiteta.

Član 26.  
(„Grant za JKP „Vodovod i kanalizacija „Tuzla)

Sredstva u budžetu, u organizacionoj jedinici Služba za komunalne poslove, izgradnju i poslove MZ, na poziciji „Grant za JKP „Vodovod i kanalizacija „Tuzla za otplatu anuiteta za izgradnju postrojenja pitke vode Cerik, realizovat će se na osnovu zahtjeva nadležne Službe, odnosno na osnovu Odluke Gradonačelnika o korištenju sredstava prikupljenih po osnovu naknade za obezbjeđenje angažovanog kapaciteta za priključenje novih korisnika na vodovodnu i kanalizacionu mrežu.

Član 27.  
(Grantovi – učešće Grada u projektima energetske efikasnosti)

Sredstva u budžetu, u organizacionoj jedinici Služba za komunalne poslove, izgradnju i poslove MZ, na poziciji Grantovi – učešće grada u projektima energetske efikasnosti realizovat će se na osnovu Odluke Gradonačelnika, na prijedlog resorne Službe, a sve u skladu sa Akcionim planom energetske održivosti razvoja Grada Tuzla, usvojenim Odlukom Općinskog vijeća broj: 01-23-6395-2011, od 13.07.2011. godine.

Član 28.  
(Naknade za rad stručnih komisija)

(1) Sredstva utvrđena u budžetu za isplatu naknada za rad stručnih komisija za tehnički prijem objekata, isplaćuju se na osnovu Odluke o uslovima i načinu formiranja komisija za tehnički pregled, visinu i način plaćanja troškova za tehnički pregled građevina („Službeni glasnik općine Tuzla“, broj 9/12).

(2) Sredstva utvrđena u budžetu za rad u stalnim i privremenim komisijama čije osnivanje je predviđeno posebnim zakonom, koje imenuju Gradonačelnik, odnosno rukovodioci općinskih službi, isplaćuju se u skladu sa Odlukom o naknadama uposlenika općinskih organa Tuzla („Službeni glasnik općine Tuzla“, br. 11/10, 1/11, 10/11, 8/12) i Odlukom o načinu ostvarivanja ušteda u Općini Tuzla („Službeni glasnik Općine Tuzla“, broj: 10/09, 13/09, 3/10 i 11/10, 3/11, 11/11, 11/12, 3/13, 10/13, 2/14).

Član 29.  
(Sredstva za zaštitu i spašavanje)

Sredstva utvrđena u Budžetu Grada Tuzla u okviru izdataka „Službe za civilnu zaštitu - Sredstva za zaštitu i spašavanje“, koristit će se prema godišnjem planu korištenja sredstava za zaštitu i spašavanje, koji donosi Služba civilne zaštite uz saglasnost Gradskog štaba civilne zaštite, a transakcije po ovom osnovu vršit će se putem namjenskog transakcijskog računa Grada Tuzla, kao podračuna JRT.

## **IV - FINANSIJSKO IZVJEŠTAVANJE**

### **Član 30. (Izveštaji o izvršenju Budžeta)**

(1) Služba za budžet i finansije dužna je podnositi Gradonačelniku tromjesječni, polugodišnji i devetomjesečni finansijski izvještaj o izvršenju budžeta u roku od 30 dana po isteku obračunskog perioda, a godišnji izvještaj do 15. aprila tekuće godine.

## **V - ZADUŽIVANJE I UPRAVLJANJE DUGOM**

### **Član 31. (Stvaranje obaveza)**

- (1) Grad može stvoriti obaveze na osnovu zaduživanja ili izdavanja garancija.
- (2) O visini zaduživanja i garancijama odlučuje Gradsko vijeće.
- (3) Otplata duga Grada predstavlja obavezu Grada.

### **Član 32. (Svrhe zaduženja)**

Grad Tuzla se može zadužiti u slijedeće svrhe:

- (1) za finansiranje kapitalnih investicija i posebnih programa odobrenih od Gradskog vijeća;
- (2) za plaćanje, na temelju izdatih garancija Grada, u potpunosti ili djelimično u slučajevima kada zajmoprimac ne isplati svoje obaveze;
- (3) za finansiranje budžetskog deficita.

### **Član 33. (Svrhe izdavanja garancija)**

(1) Grad može izdati garanciju samo za finansiranje kapitalnih investicija, i samo pod uslovom da je pravna osoba koja je zajmoprimac sredstava pravna osoba čiji je većinski vlasnik Grad ili je pod nadzorom Grada.

(2) Grad vodi popis duga, izdatih jemstava i zajmova, a evidentira ih u sistemu Glavne knjige trezora.

## **VI - RAČUNOVODSTVO I NADZOR BUDŽETA**

### **Član 34. (Računovodstvena načela)**

(1) Budžetsko računovodstvo se zasniva na računovodstvenim načelima: tačnosti, istinitosti, pouzdanosti, sveobuhvatnosti, pravovremenosti i pojedinačnom iskazivanju poslovnih događaja, te na međunarodnim računovodstvenim standardima za javni sektor.

(2) Budžetsko računovodstvo se vodi po načelu dvojnog knjigovodstva i na računima kontnog plana budžeta.

### **Član 35. (Načelo modificiranog nastanka događaja)**

(1) Priznavanje prihoda i primitaka, te rashoda i izdataka putem sistema Glavne knjige provodi se po načelu modificiranog nastanka događaja.

(2) Prihodi i primici priznaju se u onom periodu kada su mjerljivi i raspoloživi, to jest kada su uplaćeni na račun budžeta.



(3) Rashodi i izdaci priznaju se u onom periodu kada je obaveza nastala za plaćanje.

**Član 36.**  
(Odgovornost za stvaranje obaveza)

(1) Rukovodioci gradskih službi za upravu i gradskih stručnih i drugih službi, gradskih upravnih organizacija, Gradski pravobranilac i direktori javnih ustanova kao budžetskih korisnika odgovorni su za interni nadzor, uključujući i potrošačke jedinice koje spadaju u njihovu nadležnost.

(2) Služba za budžet i finansije vrši nadzor računovodstvenih dokumenata budžetskih korisnika.

**VII - JAVNOST I TRANSPARENTNOST BUDŽETA**

**Član 37.**  
(Objavljivanje dokumenata)

(1) U cilju obavještanja javnosti o upravljanju javnim prihodima - Budžet, Dokument okvirnog budžeta, Odluka o izvršavanju budžeta i ostali dokumenti vezani za izvršavanje budžeta, objavljivat će se u Službenom glasniku Grada Tuzla, u skladu sa članom 100. Zakona o budžetima u FBiH.

(2) Svi dokumenti iz stava 1. ovog člana, objavljivat će se i na internet stranici Grada Tuzla.

**VIII - PRELAZNE I ZAVRŠNE ODREDBE**

**Član 38.**  
(Primjena podzakonskih akata)

Na sva pitanja koja nisu regulisana ovom Odlukom, a tiču se načina izrade, donošenja, izvršavanja budžeta, zaduživanja, duga, računovodstva, nadzora i revizije budžeta, primjenjivat će se odredbe važećih zakona.

**Član 39.**  
(Stupanje na snagu)

Ova Odluka stupa na snagu danom objavljivanja u „Službenom glasniku Grada Tuzla“, a primjenjivat će se za fiskalnu 2015. godinu.

**Bosna i Hercegovina**  
**Federacija Bosne i Hercegovine**  
**Tuzlanski kanton**  
**GRAD TUZLA**  
**GRADSKO VIJEĆE**  
**Broj:01-14-\_\_\_\_\_2014**  
**Tuzla, \_\_\_\_\_2014. godine**

**PREDSJEDAVAJUĆI VIJEĆA**

**Jozo Nišandžić**